



賀年卡

又兼年咁！前幾日係去郵局買咁幾下張新年个郵票，明年就係牛年，郵票頂項畫等一隻毋知係麼个牛个畫像，毋故確定係新年郵票。

臺灣人過年節个慣序這下恁起來盡生趣，對新曆年下个耶誕節，到舊曆年个過年，臺灣人總做得同親朋好友祝福。聖誕節快樂也好、新年快樂，抑係「春節」祝福，聚概都做得。幾下十年前，係在聖誕節前幾日，總會收著一張對臺北寄來个賀年卡。

該係本來歇共莊个陣黨，因為佢等个爺衰食頭路个原因，歸家人遷徙去臺北歇。該時節个環境無像這下恁利便，係講無緊急个事，愛知得對方个消息，靠寄信仔係最簡單个方式。閒常時佢等也無麼个聯絡，就係年下个一封賀年卡。佢等每年寄來个卡片頂項，大部分都係畫等雪國个風景，又搭印等金金个字格，仰仔看都分人有一種想愛去該仔邊寮个望想。

打開對摺个賀年卡，裡背共樣印等盡闊个字體，寫等祝福个話。該下還細，英文看半息都毋識，毋過錫著佢个係朋友佢等兩兄弟用手寫、有兜仔整端个字。佢等每年總會在頂項寫等哪久寮寒假，哪下仔會歸來莊下過年。坐火車歸來？看電視新聞放送，該敢毋係愛排一兩日个列仔，正有法度買著車票麼？

佢愁罔愁，心肝肚總係歡喜啊會瘦！共快就愛來退錢筒，對挾錢个豬嫲背囊挖出幾個銀。騎等腳踏車，就愛去鎮項个書局買賀年卡來回信。該書局个屋簷下攤等盡多闊闊个賀年卡，佢心肚仔恁，朋友佢等歇北部，無定著會落雪，故所佢等用雪國風景个卡片。佢歇南部，嘎毋就愛用花樹開等花个來回信？毋過選來選去，每年都還係選著看起來係寒天風景个。

佢等个字整整，佢自家个又乜無幾正板，吾姆閒常時看著佢寫學校个字，總會嚟佢無用心，寫著个字比符誥過得一息。毋過這下愛回信，佢就慢慢仔用割字樣仔來寫，搵咁一暗晡就淨在卡片裡背寫著「佢等你等歸來」幾隻字。無學過寄信仔个佢，就在信封頂項，將雙方个住所地址位跡對調寫，佢毋知佢等有收著佢个回信過無？毋過佢等每年總會照等賀年卡頂項交代个日腳歸來。

幾下年後，科技發展進步咁！手機仔、網路在佢等个生活裡肚緊來緊方便，定定仔在年下也無買新年郵票、寄卡片咁。閒常係有朋友用手机仔傳來麼个問安个圖片，隨手珍等就再抹咁傳分其他个朋友，這下哪有麼人再寄麼个賀年卡？有幾下擺想愛來買賀年卡，還無買進前用手机仔問幾個朋友住址，對方黏時問講愛做麼个？等知得佢想愛寄賀年卡該下，這兜朋友毋係應佢「神經」，就係講啊莫恁得人惱、望毋得郵務士無閒哪！

佢買好郵票，看等頂項牛仔个圖，恁起頭擺个郵票印等个就係一隻牛仔，這下緊畫緊抽象、看毋多識咁，就像人同人个感情緊來緊虛華、看毋多真共樣！等佢來到鎮項，想愛來買賀年卡，這下嘎連書局都關門、收起來咁！心肚正恁啊，時代仰變得恁遽？

佢看等該新年郵票，還係該種等等想看著个人歸來个心情，唉！這下嘎毋知愛寄分麼人賀年卡？

作者：陳志寧

☆詞彙學習☆

【兼年】giam' ngian'：快要過年的時候。

【字格】sii gied'：字跡。

【陣黨】ciin dong'：一起玩的伴。

【瘦】leu'：加強語氣用。

【又搭】iu dab'：而且、並且。

【退錢筒】tui qien' tung'：把硬幣從撲滿拿出來。